





[GENERAL](#)

UMP kenal pasti kompetensi kumpulan bakat bakal pemimpin universiti

9 June 2023

Disediakan oleh: Mimi Rabita Haji Abdul Wahit, Bahagian Komunikasi Korporat, Jabatan Canseleri

PEKAN, 8 Jun 2023 - Kecemerlangan sesebuah universiti itu tidak hanya bergantung kepada kecemerlangan akademik, penyelidikan dan inovasi semata-mata tetapi banyak bergantung kepada struktur pengurusan dan tadbir urus yang mantap.

Naib Canselor Universiti Malaysia Pahang (UMP), Profesor Dato' Ts. Dr. Yuserrie Zainuddin berkata, Program Penilaian Profil Kepimpinan Siri 1 yang dilaksanakan ini bakal mengenal pasti dan menilai bakat bakal-bakal Pemimpin Akademik dan Pegawai Pentadbir yang berpotensi tinggi untuk mengisi jawatan-jawatan strategik UMP.

“UMP membangunkan profil kompetensi Kumpulan Bakat UMP pada peringkat awal supaya kumpulan bakat dapat mengenal pasti kompetensi dan membina garis asas (*base line*) untuk ke peringkat yang seterusnya,” katanya.



Program yang bakal dilaksanakan itu juga dapat mengenal pasti tahap kompetensi dan potensi kepimpinan kolam bakat UMP yang akan dijadikan asas untuk persediaan '*Leadership by Design*' bagi UMP.

Dalam pada itu juga dapat mengenal pasti jurang kompetensi yang wujud bagi setiap bakat bagi maksud perancangan pembelajaran dan pembangunan (*learning and development*) bakat.

Tambah Profesor Dato' Ts. Dr. Yuserrie, kepimpinan universiti cemerlang yang berprinsipkan 3R, iaitu Relevant (Relevan), Respected (Dihormati) dan Referred (Dirujuk) ini perlu diterapkan dalam melaksanakan proses penyampaian berteraskan sumber manusia kompeten.

Beliau hadir merasmikan Program Penilaian Profil Kepimpinan Siri 1 2023 sebagai merealisasikan agenda pengurusan dan pemerksaan bakat kepimpinan UMP agar usaha pembangunan bakat kepimpinan institusi dapat dilaksanakan dengan lebih terancang serta holistik.

Program anjuran Bahagian Pembangunan Sumber Manusia dan Task Force Inisiatif Profiling Pembangunan Bakat UMP dengan kerjasama Akademi Kepimpinan Pendidikan Tinggi (AKEPT) itu menyasarkan penghasilan 100 profil kepimpinan kumpulan bakat UMP yang akan turut disalurkan kepada Akademi Kepimpinan Pendidikan Tinggi (AKEPT).

Program akan diteruskan dengan Klinik Penilaian Profil Kepimpinan UMP Siri 1 2023 yang akan berlangsung pada 13 hingga 14 Jun 2023.

Turut sama dalam program Timbalan Naib Canselor (Penyelidikan dan Inovasi), Profesor Ts. Dr. Kamal Zuhairi Zamli dan Pendaftar/Ketua Pegawai Operasi, Saiful Bahri Ahmad Bakarim, Pengurus Besar Jabatan Hal Ehwal Pelajar dan Alumni, Haryani Abdullah yang merupakan Ketua *Task Force Profiling* Kumpulan Bakat UMP.